

SAN PABLO KARTA EFXESO ÇXHABTEWE'SX JÏI

Efxeso çxhabtewe'sxtxi fxi'jni

1 ¹ Adxa' Jesukristo jxkaahnisa Pablo yaaseth, txã'wëte selpiwa'jsa Dxus nvxiitnisa. Txãa pa'ga Dxus luuçx Efxeso çxhabtewe'sx jïi naa karta's fxi'ljçxa kajaçthu, Kristo Jesusa's nwëese'jna fxi'zesawe'sxtxi weçxana. ² I'kwe'sxtxi' Dxusa' pu'çxhina vxite' kwe'sxtxi jxpe'jsa Jesukristowa, txãa pa'ga Dxus yakhçxáa mfxi'zewe.

Kristo jïi yuupa'ga Dxus iiméh wala pu'çxni

³ Kwe'sxtxi jxpe'jsa Jesukristo Tata's wala yuh weçxawa'j jip'tha'w. Kwe'sxa' Kristo yakh utxaapa'ga kîh yuhwa peejxmée jxukak txajx dxi'pte jxpubamée fxi'zewa'ja's nvxiht cielutewe'sx yuuwa'ja's. ⁴ Txãasa ïik naa kiwe meetey Dxusa' kwe'sxtxi' txhitxh, kîh pkal yuhwa jip'hmée Kristo na'wëysa yuukahn. ⁵ Kwe'sxa' kîhte yuhwa seelpimeesatawa Dxusa' naasáa peeygãhçxa yuuçxáak Jesukristo nwe'wete', kwe'sx txajx luuçx yuuwa'ja's dxiikhëy vxitçxa nvxiht. ⁶ Txã'wë peeygãapa'ga Dxusa's bagaçxtewa weçxana yuuçxáa tuuthe'jwa'j jip'tha'w, txajx Nçxi'k Jesukristo nwe'wepa'ga. ⁷ Txãa Jesukristok kwe'sxtxi' nwe'we txajx eeju kwe'sx pkaltxi jxuka peltunãyçxa. Nawa Dxusa' kwe'sxtxi wala peeygãhçxa yuuçxáak txã'wë yuuwa'ja's vxit. ⁸ Txã'wëy Dxusa' kwe'sxtxi' kîhte yuhwa peejxmée jxuka äate kaajiyu'kh. ⁹ Nyafxiitey kim yuhwa jiyunimeete ma'wë yuuwa'ja's ne' vxitçxa jip'hu' txã'snak kwe'sxtxi kaajiyu'j. ¹⁰ Txãa yu' na'wëk yu': cielute üssa vxite' naa kiwetewe'sx yã'ljçxa jxuka Kristoçxaçxá's nwëese'jwa'ja', aça' txã'wë yüuwa'j en ähte', jxuka kxtey yuuna.

¹¹ Dxus jïi yu'sa' jxuka jxpa'gawa'ja's Dxusa' nyafxiitey ne' pheu'ljçxa nvxiht Kristo nwe'wenisawe'sx jïi. Naa pa'ga Kristo nwe'wenisa' jxpa'gawa'jsatha'w Dxus pheu'ljçxa nvxiitni yu' jxuka. ¹² Kwe'sx txã'wë

yūuwa'ja'sku Dxusa' pheu'jçxa nvxiht, Kristo's nyafxte neewe'wesa kwe'sx txā'wē Dxus ew yūupa'ga weçxaakahn. ¹³Aça' i'kwe'sxwa txā'wēy Dxus yuwe ewte nvxiitwa'jsa's wēse'jçxa Kristo yakh fxi'zeyea' utxaaçpkaçxha', Dxus ūsni txajx Espiritu' i'kwe'sx ūuste khēek, Dxus kuseju peena yu' txutekahmen. ¹⁴Aça' Dxus Espiritu's ūuste ji'phsa' nmeh ente' txajx nasatx jxukate nwe'wena jxā'jnijū' Dxus jii yu'sa' kīhnawa jxuka jxpa'gawa'jsaçxa txā'wē txajx Espiritu's ji'phsa ya'yuuna. Txāa pa'ga Dxus txakwe wala ew yūusa's weçxawa'ja'.

Dxus yakh jwee'íçxáa ew fxi'zewa'ja's kaajiyu'khan pēyni

¹⁵Txāa pa'gath adxa' txā'wē i'kwe'sxa' Kristo Jesus yakh jxpubameetx fxi'ze', sa' Dxus luuçx jxukaysawe'sxtxi peeygāja'tx jīni's jiyuçxa', ¹⁶bagaçxtewa Dxus yakh puutx we'wena weçxana nes yu'. ¹⁷Sa' kwe'sxtxi nwe'wesa Jesukristo Tata cielutewe'sxa's pēyi'th, txāa yakh jwee'íçxáa ew fxi'zewa'ja's kaajiyu'khan, ¹⁸kxah i'kwe'sxtxi kījxa' nwe'weçxawa ew kaajiyu'juna. Sa' cielute Dxus jī's kīhnawa jxuka jxpa'gawa'j jī'ptha'w txā' seena' yuh wala zhiçxkwesa' txā'snawa jiyune'kwe. ¹⁹Sa' Dxus ājanisa kwe'sx ūustxi yu'pthehsa' seena' yuh walasa' txā'snawa jiyune'kwe. ²⁰Dxusa' txāa ājanisa yakh íçxáak Kristo's uunijūwa ki' itxi vxitçxa cielute txajx pukate kaykaçxi'j. ²¹Sa' Kristo's cielute txajx pukate kaykaçxi'jçxak naa kiwete vxite' cielute maa maatewa jxthaakwe walasa vxitçxa jxkaahwa'ja's ūs, naa ente ma'k yuu meeçxa' vxite ente ma'k yuu nawa maatewa Kristoçxaçxáa jxthaakwe walasa yuukahn. ²²Dxusa' txā'wē yūuçxak kījkīhwa Kristoçxaçxá's nwēese'jwa'ja's vxitçxa txajx luuçx yuutxi's Kristo yakh ih fxi'zewa'jsa vxit, txāawe'sx yuuçxáa maatewa puutejka wedxnisa txajx jxpe'jni yuukahn. ²³Txāa pa'ga Kristo jxpe'jnisa' txāa yakh teeçxçxáa yuuna pa'jçxa, txāa na'wēysa íçxáata', kīh yuhwa jwee yu' peejxmeesa.

Dxus peeygāpa'ga yuuçxáa nwe'wenisa

2 ¹Dxusa' Kristo'swa ma'wēga itxi vxit, txā'wēyku i'kwe'sxtxiwa itxi vxit. Txā'wēme', nyafxiaa' i'kwe'sxa' pkalpa'ga Dxus dxi'pte uuní na'wē yā'ji'kwe ūs yu'. ²Txāasai'kwe txagaçxtey yu' eçxthē'j naa kiwete jxkaahni yuuçxá's nwēese'jna ūsu'. Dxusa's nwēese'jya' wa'lsa yuutxi's eçxthē'ja' jwee'íçxáak kwa'lu'ju', aça' txā'snai'kwe nwēese'jsa yu'. ³I'kwe'sxçxáamée, kwe'sxwa nyafxiaa' txā'wēçxaçxáatha'w fxi'zesa yu' jxukaysa, ewmée yaakxníçxá's jxuka kxtey yuuna. Txāa pa'ga Dxus kastigo seena'sa's jxpa'gawa'jsatha'w yu' maawa jxukaysa.

⁴Nawa txā'wē pkalpa'ga Dxus dxi'pte uuní na'wē yā'j ūstewa, Dxusa' kwe'sxtxi iiméh wala ew yūuk peeygāhçxa. ⁵Txāasak Kristo'swa ma'wēga uunijūwa itxi vxit, txā'wēy kwe'sxtxiwa itxi vxit. Kīhte yuhwa seelpimeesaçxawa, Dxus peeygāpa'ga yuuçxáai'kwe nwe'wenisa yuu.

6Dxusa' Kristo'swa ma'wēga uuniijūwa ītxi vxit, txā'wēy kwe'sxtxiwa ītxi vxitçxak cielute Kristo yakh kaykaçxi'lj. 7Nawa kwe'sxtxi txajx peeygāani txakwe seena' walasa's naa e'su' āate kaavxya'ja'ljya'k txā'wē yūu kwe'sx txakwe wala āhmeekwetewa, naasāa Kristo pa'ga yuuçxāa. 8Txāa pa'ga i'kwe'sxa' kīhte yuhwa seelpimeesaçxawa, naasāa Dxus peeygāhçxa nwe'wenisaçxāa i'kwe, txā'wē Kristo's ūsuh jxuka yaakxpaga. Dxus nwe'weni's i'kwe'sx kakweju ew yūuna fxi'zeçxa uymeei'kwe, txā'sa' Dxusku pees peeygāhçxa. 9Dxus nwe'weni's kakweju ew yūuna fxi'zeçxa ya'ljypa'ga'çme' naa pa'ga maa yuhwa iivejçx yaakxwa'lj ji'phmeeta'. 10Txāa pa'gatey kwe'sx u'se yu'pthehwa'ja's Dxus pheu'ljçxa nvxiitnisatha'w, ewçxāa yūuna Kristo Jesus jxpe'ljni fxi'zewa'jsa. Txā'wē yūuna fxi'zewa'ja's Dxusa' nyafxiiteyku pheu'ljçxa nvxiht, txā'wē yuuçxāa yūuna fxi'zekahn.

Dxus tasxte pa'ljwa'ja's ji'phuni

11I'kwe'sxa' nyafxiia' ma'wēsakwe yu' txā'sna miijajkxwe: i'kwe'sxa' judiu ji'jmeei'kwe yu', aça' judiue'sxa' i'kwe'sxtxi's Dxus txhitxnimeesata' jīnatx we'we'. 12Sa' txāa ensu' judiue'sx yakhmēe fxi'zesa i'kwe yu', Kristo's ūuste ji'phmeesa. Sa' i'kwe'sxa' Dxus pu'çxwa'ja'swa ji'phmeesa i'kwe yu'. Txāa pa'ga i'kwe bagaçxte yuhwa Dxus tasxte pa'ljwa'lj yu'sa' ji'phmeesa yu'. 13Makwe nyafxii' yu' Dxus tasxte pa'ljwa'ja's ji'phmeesaçxawa, āçxha' Kristo Jesusa's nwēese'ljya' utxaapa'ga, Dxus tasxte pa'ljwa'ja's uyi'kwe, Kristo' i'kwe'sxtxi nwe'weya' kluuste uupa'ga. 14Kristo' txā'wē yūuçxak judiue'sx judiu ji'jmeesatx ahçena fxi'zeni's ivxiituçxa e'zsatx teeçx jwedçxāa vxitna pa'lj. 15Sa' Moises leya'swa kaapçul'ju'k, Kristo tasxteçxaçxāa utxaaçxa e'zsa puutx yahçemēe kxteeçxah ih fxi'zekahn. 16Kristo' kluuste uuçxak e'zsatx kxteeçxah ih fxi'zewa'ja's vxitçxa, Dxus yakh yuuwemeesa vxit.

17Kristo' kīhçxa' e'zīi Dxus yakh yuuwemēe neeyūuwa'ja's pta'sxku, i'kwe'sx Dxus tasxte pa'ljwa'ja's ji'phmeesatxwa pta'sxku, sa' judiue'sx Dxus tasxte fxi'zesatxwa pta'sxku. 18Txāa pa'ga āçxha' judiumtha'w yuu meeçxa' judiueemtha'w yuu nawa Dxus Espiritu's jxpa'gaçxa e'zīi Dxus tasxte pa'ljwa'ja's ji'ptha'w. 19Āçxha' i'kwe'sxa' nasa ekajuwe'sx meei'kwe, Dxus luuçx yakh kxteeçxah utxaaçxa teeçx yattewe'sxçxāa i'kwe yuuna pa'lj jxukaysa txāa na'wēsaçxaçxāa. 20Txā'wē kxteeçxah utxaapa'ga ew jiyute yu' i'kwe'sxa' yat na'wēsa i'kwe: yata's nyafxte' kwet yakhku ya'kaaçxida'ja', aça' txāa kaaçxida'ljnisa yu' Jesukristo'. Txā'wē yuuna mjīiya' takhsa' Dxusna selpisaawe'sx vxite' Jesus jxkaahnisawe'sxtxi yu'. 21Aça' i'kwe'sxa' txāawe'sx kaaçxida'ljna takhni kajkwete yata's ew pheu'ljna umna u'ljnisa i'kwe, teeçx yatçxāa yuuna kāhçxa Dxus yuuçxā's selpiwa'jsa. 22Txāa pa'ga i'kwe'sxa' Jesukristo yakh utxaaçxa', Dxus txhitxhnisa maa yakhwa kxteeçxah utxasāa i'kwe yuu, teeçx yatçxāa yuuna, txāa yatte Dxus ūswa'lj yuuya'.

Dxus yuwe's judiu ji'lmeetx pta'sxwa'jsa

3 ¹Txã'wê adxa' Jesukristo kaapiya'jni's pta'sxpa'ga i'kwe'sx judiu ji'lmeexawa Dxus yakh fxi'zewa'ja's ji'phupa'ga, preesu ũsçxawa, Dxus yakh puutx we'we'th. ²I'kwe'sxa' jiiyã'jne'kwe Dxusa' i'kwe'sxtxi peeygãhçxa adxnak neewe'we i'kwe'sxtxi kaapiya'khan. ³Sa' i'kwe'sxa' judiuwe'sx yakh utxaawa'ja's kim yuhwa jiimeene'ta yu' txã'snak Dxusa' adxa's kaajiyu'j. Aça' txã'sa' i'kwe'sxtxi nyafxii pta'sxna fxi'th walameekuê. ⁴Txã'sa' lêeyçxa' jiyune'kwe kwe'sxa' judiuwe'sx yakh utxaaya' ajawa'ja'sne' Dxusa' Pablo's kaajiyu'j sũhna. ⁵Txã'snak nyafxii enteya' kim yuhtxwa kaajiyu'jnimée ũsu', nawa açxha' Jesus jxkaahnisawe'sx vxite' Dxusna selpisaawe'sxtxi Dxusa' kaajiyu'kh txajx Espiritu kaaũusuthe'the. ⁶Txã' na'wê': Makwe judiu ji'lmeexawa Kristo nwe'weni's nwêese'pha'ga yuuçxáa e'zii kxteeçxah utxaaxxa teeççxáa yuuna pa'jçxa, judiuwe'sx yakh ja'da Dxus tasxte ũswa'ja's ji'phutx, sa' Dxus ũsni Kristo jĩ's íçxáa jxuka jxpa'gawa'jsata'. Txã'wêk kaajiyu'j. ⁷Txã'wê yũuni's pta'sxwa'jsak Dxusa' adxa's nvxiht, txakwe wala ahmeekwesatewa txãafi adxa's pu'ççxá. ⁸Adxa' Dxus yakh fxi'zesa maatewa jxthaakwe ahmeekwesath. Nawa Dxusa' adxa'sku nvxiht, Kristo nwe'wenisa yuuçxáa kih'tewa thaakwe ewsa' txã'sna judiu ji'jmée vxite nasatx pta'sxkahn. ⁹Txã'wê kihnawa jxuka pheu'jsa Dxusa' judiu ji'lmeetxwa nwe'weçxa judiuwe'sx yakh kxteeçxah yuutxaya' ajawa'ja's txãniiteyku pheu'jçxa ji'phu' kim yuhtxwa kaajiyu'jnimée txã'sna áate pta'sxwa'jsath nvxiitni yuu maatxwa jxukaysatx. ¹⁰Dxusa' ma'wê yũuçxa nasa ma'wêsatxwa jxuka nwe'weçxa kxteeçxah teeççxáa vxitna pa'jni's kaajiyu'jnik yuu, aça' Dxus txã'wê yũuni's açxha' Dxus yakh fxi'zesawe'sxa', êe walatewe'sx, angeles ma'wêsawa jxuka jiyutxna. ¹¹Dxusa' txã'wêne' nasatx nwe'wewa'ja's txãniitey pheu'jçxa ji'phu' naa kiwe meetey txã'sa' kxtey yuuk, Jesukristo's naa kiwete kaahçxa. ¹²Txã'wê Kristo nwe'wepa'ga açxha' Dxus tasxte ũukhmée pa'jya' ajatha'w, txã'wê ũukhmée utxaawa'ja's Kristo íik kaaũusuthe'je' naa pa'ga. ¹³Txãa pa'ga adx i'kwe'sx pa'gate pxthaa yuuni's nxusna yajkxmée, wejxwa Dxusa'sçxáa weçxana meswe.

Kristo peeygãani iiméh seena' walasa

¹⁴Txã'wê Jesukristo Tata' nwe'wewa'ja's pheu'jçxa kxtey yuupa'gath adxa' txã'sa' peejxúkweçxa weçxana neewe'we', ¹⁵txã'sa' maawa jxukatx Tata jĩna kxsusu' Dxus luuçx naa kiwetewe'sx ma'tx yuu, cielutewe'sx ma'tx yuu nawa jxukaysa. ¹⁶Aça' adxa' Tata's pëyi'th, Dxus Espiritu i'kwe'sxtxi pu'ççxna kih'te yuhwa peejxmée çxhãçxha kaafxiz'e'khan, ¹⁷kxah i'kwe'sx ũusuh jxuka yajkxte', Kristo' i'kwe'sx ũuste nes yuuna. Txã'wê yũute!, i'kwe'sxa' jxpubamée peeygãawa'jçxá's wala ji'phuçxa

18 Dxus luuçx jxukaysa jiyuya' ajane'kwe, Kristo peeygãhçxa nwe'wenisa iiméh seena' walasa'swa. 19 Txãa peeygãani' iiméh seena' walasa' açã' çkimçxa' jiyuya' ajama'tx? Txã'wëtewa i'kwe'sx jiyukahn Dxusa's pëyi'th, kxah Dxusa's üsuh jxuka jiyuçxa txãa yakh yuuçxãa fxi'zene'kwe.

20 Dxusa's seena' yuh wala weçxaawa'ja!. Txã' kïhtewa jxuka pu'çxya' ajawa'jsa', kwe'sx makwe pëjxtewa txãate jxthaakwe wala bagaçxtewa pu'çxna nes yuuwa'jsa!. 21 Txãa pa'ga Kristo nwe'wenisa yã'j yu!, Dxusa's bagaçxtewa weçxana nes yuuwa'ja! Kristo nwe'wepa'ga.

Dxus Espiritu' ma'wësatxwa kxteeçxah yuutxani

4 1 Kristo's selpiipa'ga adxa' preesu üsthu, nawa i'kwe'sxtxi neewe'we'th: ma'wë fxi'zekahn ne' Dxusa' i'kwe'sxtxi txhitxh txã'sa' kxtey yuuna meswe. 2 Dxus yakh fxi'zesayã'ja' maa yuhwa iiwejçx yajkxmée wejxwa puutx ya'peeygãhna ewçxãa yüuna mfxi'zewe. 3 I'kwe'sxa' puutx üsçxa yajkxna fxi'zemée, wejxwa kxteeçxah txutemée fxi'zewal'çxã's mpa'pçxuwe, Dxus Espiritu' kxteeçxah yuutxa yã'kh naa pa'ga. 4 Txãasa Kristo nwe'wenisa yã'j yu!, ma'wësaçxawa kxteeçxah teeçxçxãak yuuna pa'ja', sa' kxazí Dxus Espiritu' teeçxsaçxã'stxi jxukaysa jxpa'ga', sa' kxazí teeçx ahte Dxus tasxteçxaçxãa pa'jwa'ja'sku ya'üythasu!, 5 txãa pa'gatey jxukaysatx nwe'wesa' teeçxçxã', açã' txã'sçxãanak jxukaysa ya'nwëese'je!. Sa' jxukaysa txã'sçxãanak yajkxna bautismo's ya'jyapa'ga!. 6 Sa' teeçx Dxusçxãa üsa' jxukaysate Tata txã' maatewa puutejka walasa' jxukaysatx jxkaahsa, sa' jxukaysa yakh üsa'.

7 Sa' teeçxçxãa vxítna pa'lçxawa, Dxusna selpiiya' ajawa'j yu'sa' fxiyfyiçxajk Kristo' üs teeçxsa na'wëçxah. 8 Txã'wë yüuwa'ja's we'weçxak Dxus librute na'jina fxi'jni yuu:

Ewmeesa kusejü nwe'weçxa cielun pe'jna u'kh,

Sa' naa kiwete nasatxi's ajawa'ja's üsku j'i'k.

9 ¿Ma'wëçxaga txã'wë cielute tejkak jina we'wé'? Kristo' nyafxte' uusaawe'sx üsnite khuë'y khëeçxa txãajük ki' cielute tejka jïçxak txã'jï!. 10 Txã'wë uusaawe'sx üsnite khuë'y khëesa íçxãak cielute iiméh ëe walate kãhpkaxç tejka, mteewa txãaçxãa jxuka thegna üsya' ajaya!. 11 Txã'wë yüuçxak Dxusna selpiiya' fxiyfyiçxah ajawa'ja's üs jxukaysatx teeçxsa na'wëçxah: maaitxi's txajx yuwe's nyafxte pta'sxwa'jsak nvxiht; vxitetxi's Dxus ma'wë yüuya'watewa dxiiikhëy pta'sxwa'jsak nvxiht; vxitetxi's Dxus yuwe pta'sxwa'jsak nvxiht; vxitetxi's Dxus yuwe's kaapiya'jna jxpe'jwa'jsak nvxiht. 12 Txajx nasatxi' txã'wëk mjiiwa'jsa pheu'jçxa nvxiht, txã'wë Kristo nwe'wenisa yuutxi' jweeíçxãa kxteeçxah çxhãçxha fxi'zewal'ja's kaapiya'khanku txã'wë yüu. 13 Kxah jxukaysa Dxus Nçxi'ka'sçxãa nwëese'jçxa txã'sa' ew jiyuna jxã'lçxa kïhte yuhwa jxpubamée ew fxi'zekahnku txã'wë kaapiya'lçxa nvxiht. 14 Txajü yüuçxa' luuçx na'wë

yuume'nja'w. Txã'wēmee' nasa ewmée yajkxçxa ãsxiina pta'sxnite thëyméek wetena pa'ljçxa kxte jxpubana ya'fxi'ze'. ¹⁵Txã'wē jxpubamée, wejxwa isasaçxá's we'wena peeygãawa'lj yuuçxá's yajkxçxa Kristo yakh jweefiçxáa çxhãçxha fxi'zena u'ljwa'lj ji'ptha'w. ¹⁶Aça' maawa Kristo tasxte utxaaçxa jxukaysa kxteeçxah pkhaakheçxa puutx ya'kaapiya'jna ew yūuna fxi'zete', thëyméek peeygãhna fxi'zewa'ja' walaana u'ljwe'.

Ewmée yaakxni's jxuka yu'pthehni

¹⁷Txã'wē' açá' kxahth i'kwe'sxtxi neewe'we', vxite nasa Dxusna jiimeesa na'wē fxi'zewe'sxte. Txãawe'sxa' peekx ūus yaakxni seelpiwa'jmeesaçxá'stxi kxtey yuuna fxi'ze'. ¹⁸Txã'wē Dxusa's jxpa'gaya' wa'lpa'ga Dxus yakhmée ūsçxa ew eena' yaakxwa'lj yu'sa' ji'phmeeta'. ¹⁹Txãasatx txãawe'sxa' thaame ūus yu'sa' ji'phmée, pkal seena' kazxsateçxáa fxi'ze'. ²⁰Nawa i'kwe'sxtxi' Kristo' txã'wē fxi'ze kaahme'. ²¹Txã'sa' i'kwe'sxa' peekx jiine'kwe Jesus kaapiya'jni isasa's wēse'jsa dxihçxa', ²²nyafxi' ūus yaakxni ewmeeteçxáa kaafxi'ze'jsa's nwēese'jmée jxuka nvxihtçxa, ²³ew ūus yaakxwa'ja's kaapiya'jni yakh mphu'se'jwe. ²⁴Kxah i'kwe'sx ūuste ewsa yuuçxáa yu'pthehni yuute', Dxus ma'wēne' jxthãasu' txãa yuuçxáana äate kaavxya'ja'jna fxi'zene'kwe, Dxus dxi'pte kīh pkal yuhwa ji'phmée.

²⁵Txãasa açxha' peena yu' ãsxiina fxi'zemée, wejxwa teeçxsa na'wēçxah isasaçxá's mwe'wewe maa yakhwa, txãa pa'gatey jxukaysa kxteeçxah teeçx jwedçxáa yuuna pa'jsatha'w txãa ji'ljçxaçxáatewe'sx.

²⁶Mpa'yajkxwe, ūusçxani yakhçxáa yu' fxi'zewa'jme', ewmeete weteya'mée. Txãa entey ya'mpeltunaīwe. ²⁷Eçxthē'ja's weh yuhwa ka'ga'ljnuwe.

²⁸Pesweesawa Dxusna jiyunijyã'ja', pesweewa'jme', wejxwa pesweemée kuseju mjiiçxa vxite peejiina fxi'zesatxwa pu'çxna fxi'zewa'ja'.

²⁹Sa' kazx we'wenisa yu' teeçx yuweçxáa yuhwa i'kwe'sx yuweju kasehwa'jsame', wejxwa Dxus yakh fxi'zewa'lj selpiwa'jsaçxá's we'wewa'ja', kxah vxitesawa Dxus yakh fxi'zewa'ljçxá's piyaatxna. ³⁰Sa' Dxus Espiritu'swa kxūusu'ljnuwe, txãa pa'gatey Dxus Espiritu i'çxáak i'kwe'sxtxi's Dxus jii vxitna pa'ljçxa nvxiht, Dxus tasxna u'ljwa'lj en ähtewe'sx.

³¹Sa' ewmée yajkxna, ahçena, pxūuskwe yuute juuna' we'wena, ūusaçxana ma'wēwa wēesxuna fxi'zenijū jxuka mtxuteewe. ³²Wejxwa puutx ewçxáa yūuna, teeçxsa na'wēçxah puutx peeygãhna, puutx ya'peltunãyna mfxi'zewe, Kristo kwe'sxtxi nwe'wete Dxuswa ma'wēga kwe'sxtxi peltunã y txã'wēy.

Dxus luuçxyã'ja' txãa na'wēy fxi'zeni

5 ¹I'kwe'sxa' Dxus luuçx yã'lji'kwe na' txãa na'wēy fxi'zeya' mpa'pçxuwe. ²Puutx ya'peeygãhna mfxi'zewe, txã'wē

yũukahníçxáak Kristowa kwe'sxtxi peeygãhçxa Dxus dxi'pte peekíi ya'dukhçxa piisxakuẽ na'wẽ ikhni yuu.

³Txãa pa'ga i'kwe'sxa' Dxus jiiyã'jçxa', ptamsa ma'tx yuu meeçxa' ptamsamée ma'tx yuu nawa kazx yuuna fxi'zeni's jxuka nvxihtçxa ùusteçxáa yuhwa yaakxwa'j ji'phmeei'kwe. Sa' Dxus yu's yajkxmée ji'pphu wëeniçxá's yaakxwa'j ji'phmeei'kwe. Kíhwa kazxa yu'sa' kxsuswa'jçxáa yuhwa ji'phmeei'kwe. ⁴Thaampa' yũuni kíh yuhwa seelpimeesa yu'sa' txã'wẽ we'wena fxi'zewa'jme', wejxwa Dxusa'sçxáa weçxana fxi'zewa'ja'. ⁵I'kwe'sxa' jii yã'ji'kwe: Dxus yu'sa' yajkxmée ji'pphu wëeniçxá's yajkxna fxi'zesa (txã'wẽ ji'pphu wëeniçxá's yajkxte', txã'sçxáanak dxus na'wẽ yaakxwa'j kaseje'), kazx pkal yũuna fxi'zesa, kíhwa kazsaxçxá's kxtey yuuna fxi'zesa, txã'wẽ yũusa' Dxus Kristo yakh jxkaahna ùsnite u'kaya' ajameetxna. ⁶Txãa pa'ga txã'wẽ pkal kazxsate fxi'zewa'ja's kaapiya'jni's mpa'yajkxwe. Txã'wëme' txãa pa'gafiçxáa Dxus kastigo seena'sa yuja' Dxus jxkaahni's nwëese'jmée fxi'zesawe'sx jii. ⁷Txãawe'sx yakh ja'da ewmée yũuna fxi'zenuwe.

⁸Nyafxiii' i'kwe'sxa' jxpubana ùsçxa', çxhi'dxte na'wëi'kwe fxi'zesa yu'. Nawa açxha' Kristo's ùuste jxpa'ganijũ' eena'te ùsi'kwe. Txãa pa'ga peena yu' jxpubamée eena'teçxáa mfxi'zewe Kristo nwe'wenijũyã'ja'. ⁹Eena'te fxi'zeççxa', puutx peeygãhna isasaçxá's we'wena fxi'zewa'ja', Dxus dxi'pte jxpubamée. ¹⁰Naasáa Kristo jxthãasniçxá's kxtey yuuya' mpa'pçxuwe. ¹¹Jxpubana çxhi'dxte ùssa yakh ja'da ewmée yũuna fxi'zenuwe, wejx yuuwa txã'wẽ yũusatxi' mkaapiya'jwe ewmée yũukahmen. ¹²Txã'wëme', paaçte txãawe'sx ewmée yũuna fxi'zeni's áate we'wewëete thaame yuja'. ¹³Nawa txãawe'sx ewmée kazx yũuna fxi'zeni's thaamemée áate we'wewa'ja', kxah kíh yuhwa paaçtemée jxuka áateçxaçxáa kaavxya'ja'jni yuuna. ¹⁴Txã'sna we'weçxak na'jĩ':

Jxpa'yakxmeeg fxi'ze', miiyajkx.

Sa' pkalte uuníi na'wẽ fxi'zenijũ mkaaseh,

Aça' Kristo' eena'te kaafxizel'jena jĩ'k.

¹⁵Txãa pa'ga wala jxpa'yajkx fxi'zewa'jçxá's dud mpa'pçxuwe, jiimeesa na'wẽ jxpa'yajkxmée yu' fxi'zenuwe. ¹⁶Txã'wëme' naa ensu' nxuswa'j ençxáa kasejeça', naa pa'ga en ewsatxi' ivxiitunuwe. ¹⁷I'kwe'sxa' jxpa'yajkxmée yu' fxi'zemée, ewsa's jiyuwa'ja's mpa'pçxuwe, Kristo jxthãasniçxá's ew jiyuya'. ¹⁸Txãasa tũuna fxi'zenuwe. Txã'wëme', tũunisa' vxituwa'the pel'jna u'jsa'. Aça' txã'wẽ yũumée wejxwa Dxus Espirituçxá's ùuste jxuka jxpa'gaçxa, ¹⁹i'kwe'sx pwe'sx jxukaysa Dxusa'sçxáa ùusuh jxuka yajkxna weçxana memna meswe. ²⁰Makwe wala thëysa vxyaatewa, txãatxi's nxusmée bagaçxtewa Dxusçxáana weçxana meswe, Jesukristo's pi'kçxa.

Jxukaysa puutx ya'nwëese'jna fxi'zeni

²¹Åçxha' i'kwe'sx pwe'sx jxukaysa puutx ya'nwëese'jna mfxi'zewe, Dxusa's yajkxna. ²²Nyuua' nmi'a's nwëese'jwa'j ji'pha', Kristo' txã'wëk

jxkaaja' naa pa'ga. ²³Txãa pa'gatey nmi' txã'wẽ nyuua's thegna jxpe'ljwa'jsa', Kristowa ma'wẽga txajx nwe'wenisatxi's thegna jxpe'lje' txã'wẽy. Aça' Kristo' i'neeçxáa thegna jxpe'ljmée, vxitukahmen nwe'wesa'. ²⁴Aça' Kristo nwe'wenisawa ma'wẽta Kristo's nwẽese'lje', txã'wẽy nyuuwe'sxwa nwẽese'ljwa'l jil'phta' txãawe'sx nmi'tx kihtewa jxuka.

²⁵Ãçxha' nmi'a' nyuua's peeygãawa'l jil'pha', Kristowa ma'wẽga txajx nwe'wenisatx peeygãhçxa txãawe'sx pa'gate kluuste uu txã'wẽy. ²⁶Kristo' txã'wẽk yuu txajx nwe'wenisa nasatx kih pkal yuhwa jil'phmée jxuka yaatena pa'lçxa, ²⁷txajx tasxte iiméh zhiçxkwe pheu'jni txãa yuuçxá's selpiwa'jsa vxit-yak' txã'wẽ yũu. ²⁸Nmi'a' txã'wẽ peekx nyuua's peeygãawa'l jil'pha' peekx kakwe'swa ma'wẽga ya'peeygãja' txã'wẽy, txãa pa'gatey nyuua' peekx kakwe'içxá' naa pa'ga. ²⁹Kim yuhwa peekx kakwe's açe'çme', wejxwa wala ew jxpa'yaki'k. Aça' Kristowa txã'wẽyku txajx nasatxi' wala ew jxpa'yakxna jxpe'lje'. ³⁰Txãa pa'gatey txãa jii yã'tha'w, txajx tasxte txuteeya'mée utxasáa. ³¹Txã'wẽyku ya'yu', ptamusawa peekx neywe'sxtxi nvxihtçxa nyuu yuuwa'jsa yakh ya'utxa'k txuteeya'mée, aça' e'zçxawa teeçxçxáak yuuna pa'ja'. ³²Ptamuuçxa fxi'zenisa' Kristo txajx nwe'wenisa kxteeçxah utxaçxa teeçxçxáa yuuna pa'ljwa'ja's kaajiyu'jnisa', aça' txã'wẽ teeçxçxáa yuuna pa'ljwa'ja's kim yuhwa jiimeetx yu' txã'snath pta'sxi'. ³³Aça' ptamsayã'ja', teeçxsa na'wẽçxah peekx nyuutx peeygãhna fxi'zewa'ja', i'kwe'sx kakwetx ma'wẽkwe peeygãja' txã'wẽy. Aça' nyuua' peekx nmi'a's nwẽese'ljna fxi'zewa'ja'.

6 ¹Kristo's jiiyã'jsa' luuçxwe'sx i'kwe'sx neywe'sxtxi nwẽese'ljna mfxi'zewe, Kristo' txã'wẽk jxkaaja' naa pa'ga. ²Txã'wẽ kxtey nwẽese'ljsatxi's Dxusa' wala txaçx kaafxi'ze'lja' neeyũuk txã'sa' Moises leyte na'ljina pta'sxna fxi'lçxa nvxiitni ũsa': Peekx neywe'sxtxi nwẽese'lçxa', ³wala ew fxi'zene'ga naa kiwete wala txaçx jil'k.

⁴Neywe'sxwa i'kwe'sx luuçxtxi zhiçxkwe ewçxáa miipe'ljwe, Kristo's jiyuwa'ja'sçxáa kaapiya'jna.

⁵Selpisaawe'sxwa naa kiwete i'kwe'sx patronwe'sxtxi wa'límée mwẽese'ljwe, Kristo yu's nwẽese'lje'ç na'wẽ yajkxna. ⁶Patronwe'sx thegna ũsteçxáa txã'wẽ kxtey yuuwa'ljme', wejxwa Kristo's nwẽese'lje'ç na'wẽ yajkxna kxtey yuuwa'lja', ũuste weçxana. ⁷I'kwe'sx mjia's wal' yajkxmée Kristo's selpiçthi sũhna ew mjiiwa'lja', nasatx selpiçthi sũhmée. ⁸I'kwe'sxa' jiiyã'lj'kwe patron jil'phsa ma'k yuu patron jil'phmeesa ma'k yuu nawa txã'wẽ yũusatxi' Dxus dewewa'jsa' teeçxsa na'wẽçxah ma'wẽ mjisatewa. ⁹Patronwe'sxwa i'kwe'sxtxi selpisaatx juuna' yũumée miipe'ljwe, txãa pa'gatey jii i'kwe selpisaawe'sx vxite' patronwe'sxwa jxukaysa Kristo cielute ũssa teeçx yuuçxáana nwẽese'ljai'kwe. Txãa pa'gatey Kristo dxi'pte' maa yuhwa thaakwe walasa meeta'.

Ewmeesa's deewewa'ja's jxpa'gani

¹⁰Ãçxha', yakhthẽ'ljwe'sx, çxhãçxha mfxi'zewe Kristo yakh txutemée, aça' txã' pu'çxna nes yuuna bagaçxtewa kçxhãaçxhal'jna. ¹¹Txãa pa'gatey

ewmeesa yakh puiiwa'ja's Dxusa' jxuka ũsku, aça' txãa yakh puiiçxa', eçxthê'j ewmée yūunite wetemeene'kwe. ¹²Txã'wême', naa kiwete nasaa pwe'sx yakh puina ũsmeetha'w. Naa kiwete eçxthê'j ma'wê seena' ewmée kazx txãaçaçxáa jxkaahna ũsna txãa yakh kwe'sxa' pdxi'puçxa puina ũstha'w. ¹³Txãa pa'ga ewmeesa yakh puiiwa'j Dxus ũsni's jxuka mpa'gawe, ewmeesa yakh pdxi'puçxa ũukhmée çxhãçxha deweya'. Txã'wê yūuçxa', ewmeesa ma'wêsa'swa i'kwe'sx yuh knayuune'kwe. ¹⁴Txãasa açxha' ũukhmée çxhãçxha meswe, Dxus yuwe isasaçxá's ũuste ew yu'akhçxa kxtey nwêese'jna. Ew yūuwa'j yuuçxá's ũuste jxuka mji'phuwe. ¹⁵Sa' Dxus yuwe ewte nvxiitwa'jsa's mteewa pta'sxya' u'jya'çxáa meswe. ¹⁶Aça' Dxusa' kīhtewa jxuka pu'çxhina sūhwa'j yuuçxá'sa' weh yuhwa peçxkananuwe. Txã'wê yaakxni yakha' eçxthê'j makwe seena' yuuçtewa, jxuka knayuune'kwe.

¹⁷Dxus nwe'wenijūyā'ja' txāajū weh yuhwa txutenuwe, sa' Dxus Espiritu kaapiya'jni Dxus yuwe'swa weh yuhwa peçxkananuwe. ¹⁸Txã'wêçxáa yūumée, Dxus Espiritu's pi'kxçxa Dxus yakh yuuçxáa bagaçxtewa puutx we'wena meswe, çxhãçxha fxi'zewa'ja's pējxna. Sa' Dxus yakh puutx we'wewa'ja's bagaçxte yuhwa peçxkanamée meswe, Dxus luuçç jxukaysa pa'gatewa Dxusa's mneewe'wewe. ¹⁹Sa' adx pa'gatewa Dxusa's neewe'wena meswe, kxah Kristo's ma'wê ũuste jxpa'gawa'ja's kim yuhwa jiyunimeesa's sxiigmée pta'sxya' ājakahn. ²⁰Txã'sna pta'sxwa'jsa' íçxáak Dxusa' adxa's nvxiht, aça' txãa pa'ga íçxáa açxha' preesu ũsthu. Aça' i'kwe'sxa' Dxusa's neewe'wena meswe, txajx yuwe's ũukhmée pta'sxkahn.

Yuwe weçxaa kaahni

²¹⁻²²Kwe'sx yakthê'j Tíkiko bagaçxtewa Dxus yakh txutemée pta'sx pu'çxsa txã'sa' kajaçthu, adx ma'wêne'tka fxi'ze' txã'sa' jxuka pta'sxkahn. Aça' adx ma'wê fxi'zena kīhçxah yūuna ũstewa jiyuçxa', i'kwe'sx maafí yu' nxusna ũççxawa çxhãçxha yaakine'kwe.

²³Dxus kwe'sx Tata vxite' kwe'sxtxi nwe'wesa Jesukristo txãawe'sxa' i'kwe'sxtxi pu'çxhitxna, kīhtewa ewçxáa puutx ya'peeygāhna Dxusa's yuuçxáa yajxna fxi'zekahn. ²⁴Sa' maawa kwe'sxtxi nwe'wesa Jesukristo's yaakxsa yuutxi's Dxusa' pu'çxhina jxukaysatx.